

BERTSO BERRIAK

Udako jaien aurrekontuari jarriak

Xabier Paya



INIGO AZKONA

I

Berriki guregana heldu da
azken lege europarra:
tamalez gerrikoa gehiago
gogor estutu beharra.
Gastatzen dena jaisteko, uda
bere ez da sasoi txarra...
Akaso Errealia izango da
aurten igo den bakarra.

II

Urtero San Fermin izaten da
jaien lehen zita udan,
oraindik sos asko xahutzen da
euskal zezenaren modan.
Hurrena korrikalari denek
pozirik egingo dute lan
goizero "Pobre de mí" kantatzen,
baina INEMeko kolan.

III

Ondoren Gasteiz beteko zaigu
festaz, irriz, Zeledonez,
Florida, Zapa eta Kutxiko
zenbait "vaskit@" dotorez.
Kalera atera daitezela
euren betiko umorez,
parrandan baina kamisetekin,
ohiko blusak jantzi orde.

IV

Europar legetik at gelditzen
aurten jai du Donostiak
han ere murriztu behar dira
lehenik ohiko izozkiak.
Bestalde, atera ez daitezen
beti hain su garestiak,
gauero ETBk eman bitza
berriazko guztiak!


V

Ai ama! Marijaia gaixoa
laster jarriko da triste,
nolabait Bilbo libratzen denik
arren ez dezala uste.
Udalak aitzakia jarrita
jada ez dena albiste,
Bilboko konpartsa denen txosnak
di-da kenduko dituzte.

VI

Azkenik sorta hau jarri nahi dut
lege etsenplu neurrira
kolpean pixkatxo bat murriztuz
nire silaben partida,
pasatuz zortziko nagusitik
soilik zortziko txikira;
bederen hala letra etzanak
erruz aurreztuko dira.

OHARRA: Lehen doinuarekin dena irakurri ondoren, irakurri bigarren doinuarekin hizki arruntak bakarrik, *etzanak* ez.



Bidali zure sortak bertsoak@argia.com helbidera. Aukeratuak orri honetan argitaratuko ditugu.

DOINUA: 1.-"Norteko ferrokarrila", 2.-"Pasaiako plazatik"